



Spezifesch Reegelen a Rotschléi fir Guiden- a Scoutsaktivitéiten am Kontext vun der Covid-19 Pandemie

*Dës Recommandatioune gëlle fir all Versammlungen, Sortien,
Weekender a Campen déi nom 28. Oktober 2020 organiséiert ginn.*

1. Begrëffserklärungen.....	2
2. Allgemenges : Aktivitéiten a Covid-19 Zäiten.....	2
3. Innerhalb vun der Kontaktgrupp.....	3
4. Ausserhalb vun der Kontaktgrupp.....	3
5. Responsabilitéit vun de Chefs.....	4
6. Arrivée an Départ	4
7. Programmaktivitéiten	4
8. Ravi	5
9. Schlofen	5
10. Hygiène	6
11. Botzen	6
12. Transport.....	6
13. „Gestes barrières“	6
14. Individuell Schutzausrüstung.....	7
15. Wann „ufälleg“ Chefs oder Jonker op der Aktivitéit dobäi sinn.....	7
16. Wa Jonker oder Chefs Symptomer vun enger Coronavirus-Infektioun hunn.....	7
17. No der Aktivitéit.....	9
18. Schlusswieder.....	9

Versioun 4 vum 12.11.2020

Dëst Dokument ersetzt d’Versioun 3 vum 10.09.2020, d’Ännerunge si **rot** markéiert.

Bei Onkloerheeten oder Froen : covid@lgs.lu kontaktéieren





Fir dësen Text méi lieserlech ze maachen, si bei all Begrëff, dee souwuel männlech wéi och weiblech ka sinn, all Kéier déi zwee Geschlechter gemengt, ausser et gëtt speziell präziséiert ; z.B.: „Chef“ = Chef oder Cheftaine.

1. Begrëffserklärungen

- „Aktivitéit“ : Versammlung, Sortie (1 Dag), Weekend (1 oder 2 Nuechten) oder Camp (> 2 Nuechten)
- „Jonker“ : Biber, Wëllefcher, Avex, CaraPio, RaRo déi als „Participant“ un der Aktivitéit deelhuelen
- „Chefs“ : Jonker an Erwuessener déi d’Aktivitéit organiséieren an encadréieren (ernannte Cheftainen a Chefs, Stagiär-Chefs, Mataarbechter, Kachekipp, asw.)
- „Kontaktgrupp“ : Grupp vu Jonken a Chefs déi zesummen un enger Aktivitéit deelhuelen (z.B. Biberfamill, Wëllefchersrudel, Avex-Trupp, CaraPio-Trupp, RaRo-Clan), och wann e puer verschidden Unitéiten oder Branchen zesummen un der Aktivitéit deelhuelen
- „Mask“ : eng chirurgesch Mask oder en anere Schutz deem d’Nues an de Mond komplett bedeckt (z.B. Multifunktionschal)

2. Allgemenges : Aktivitéiten a Covid-19 Zäiten



- D’Pandemie vum Covid-19 huet eng ganz Rëtsch nei Reegele mat sech bruecht, déi – jee no Situatioun an no Zäitpunkt – méi oder manner restriktiv ëmgësat ginn. **Dës Reegele sinn am „Covid-19 Pandemie-Gesetz“ festgehalten.**
- Fir „parascolaire Aktivitéite“ gesäit d’Covid-19 Pandemie-Gesetz Ausnamen zu den allgemeng gëltege Reegele vir. **Guiden- a Scoutsaktivitéiten zielen als „parascolaire Aktivitéiten“.**
- Aktivitéite vu Jugendorganisatiounen goufe vum Educatiouns- a Jugendministère explizitt erlaabt, **a sinn och erwënscht**, ënner e puer Konditiounen a mat spezifesche Rotschléi vun der Direktioun vun der Santé.
- D’Aktivitéite fannen a feste „Kontaktgruppe“ statt.
- D’Kontaktgruppen **däerfen** aus maximal **30** Leit (Jonker a Chefs) bestoen.
- Fir d’Organisatioun vu Weekender a Campe goufe **speziell Konditiounen** zousätzlech zum LGS-Reglement Nr 13, festgeluecht.





3. Innerhalb vun der Kontaktgrupp

- Während der ganzer Dauer vun der Aktivitéit hunn alleguer d'Participanten (Jonker a Chefs) permanent eng Mask un, souwuel banne wéi baussen. Dëst gëllt net beim iessen, drénken, schlofen a wäschen (cf. Punkten 8, 9 an 10). Kanner ënner 6 Joer mussen keng Mask droen.
- Allgemeng, sinn d'Reegele vun der Distanz op Aktivitéite vu Jugendorganisatiounen opgehuewen. Et gëtt awer recommandéiert, déi Jonk op d'Reegele vun der Hygiène an der Distanz ze sensibiliséieren, och wann dës während der Aktivitéit net zu all Moment kënnen agehale ginn.
- D'Chefs sollen ënnert sech – souwäit wéi méiglech – eng Distanz vun 2 Meter anhalen.
- D'Zesummesetzung vun der Kontaktgrupp **muss** während der ganzer Aktivitéit déi selwecht bliwen.
- Et soll eng Lëscht bestoen, mat all de Jonken a Chefs déi un der Aktivitéit deelhuewen.
- Fir ze vermeiden, dass am Fall wou e Jonken oder Chef op enger Aktivitéit géing positiv op Covid-19 getest ginn (cf. Punkt 16), eng grouss Unzuel vu Leit missten a Quarantaine gesat ginn, gëtt geroden, dass während der Aktivitéit d'Kontaktgrupp – souwäit wéi méiglech – an e puer méi kleng Ënnergruppe **vu jeeweils 4 Jonker** agedeelt gëtt.
- All d'Ënnergruppe vu Jonke solle – souvill wéi méiglech – während der ganzer Aktivitéit vun deenen aneren Ënnergruppe getrennt „liewen“, d.h. an eegenen Dortoiren oder Zelter schlofen, un engem eegenen Dësch iessen, d'Programmaktivitéite gréisstendeels beienee bliwen.
- D'Chefs solle sech och op déi eenzel Ënnergruppen opdeelen, esou dass all Ënnergrupp ëmmer vun deene selwechte Chefs betreit gëtt.
- *N.B.: Dës Moosname sinn u sech schonn an der Guiden- a Scoutsmethod verankert, ënnert dem Grondsaz vum „Liewen a kleng Gruppen“ : während dem Camp liewen déi Jonk a Sizainen, Patrullen oder Ekippen, an deene si zesumme kachen, iessen, Aktivitéite maachen, asw. D'Chefs begleeden dës kleng Gruppen als „Pätter“ oder „Giedel“.*



4. Ausserhalb vun der Kontaktgrupp

- De Kontakt tëschent der Kontaktgrupp a Leit vu bausse muss vermidde ginn.
- Bei Kontakt mat enger externer Persoun, déi net zu der fester Kontaktgrupp gehéiert, mussen d'gestes barrières agehale ginn.
- Souwäit wéi méiglech vermeiden, dass zwou verschidde Kontaktgruppen ënnertenee gemëscht ginn. Wann zwou Kontaktgruppe sech begéinen, mussen d'Reegele vun der sozialer Distanz agehalen **a Maske gedroe ginn**.
- Fir am Fall vun enger Infektioun den „Tracing“ ze vereinfachen, soll e „Logbuch“ gefouert ginn, mat den Nimm an Telefonsnummere vun den externe Leit, mat deene während der Aktivitéit e Kontakt besteet (Besuch, Buschauffeur, Gérant vum Chalet, asw.).



5. Responsabilitéit vun de Chefs



- D'Chefs müssen déi néideg Moossnamen huele fir eng Infektioun während der Aktivitéit ze vermeiden **a sech un d'Reegelen halen, déi de Verband virgëtt.**
- Sou vill wéi méiglech Chefs sollen eng Formatioun matgemaach hunn, wou déi sanitär Reegelen erkläert ginn a si drop virbereet ginn, fir déi Jonk op d'gestes barrières ze sensibiliséieren (dës Formatioun gouf vum SNJ via Zoom ugebueden).
- Virun a während der Aktivitéit sollen d'Chefs Usammlunge vu Leit vermeiden (z.B. net op eng Party goen). Si solle während der Aktivitéit nëmmen dann op aner Plaze goen, wann et wierklech noutwenneg ass.

6. Arrivée an Départ



- Wann d'Elteren déi Jonk op d'Aktivitéit bréngen oder siche kommen, gëtt geroden dass si d'Reegele vun der sozialer Distanz anhalen **an eng Mask unhunn.**
- Fir d'Kräize vun externe Leit ze vermeiden, sollen d'Arrivéen an d'Départe vun de Jonken an der Zäit gestaffelt sinn (z.B. „Kiss and Drive“).

7. Programmaktivitéiten

- **D'Aktivitéite sollen dobaussen, un der fräier Loft, gemaach ginn.**
- Spiller a soss Aktivitéite mat intensivem a verlängertem Kierperkontakt vermeiden.
- Material a Spillsaachen, déi net kënne gebotzt ginn, souwäit wéi méiglech op der Säit loossen.
- Et solle keng Ausflich gemaach ginn, op Plaze wou vill Leit beienee sinn.
- Genuch Zäit virgesi fir ze raschten ; d'Middegkeet an de Stress schwächen den Immunsystem a maachen ee méi ufälleg fir Infektiounen.
- **D'Ausgangsspär vun 23h00 bis 06h00 muss agehale ginn. Also dofir suergen, dass d'Aktivitéit fréi genuch ophält, soudass jidderee mat Zäite kann doheem sinn.**



8. Ravi

- Déi Jonk an d'Chefs kënnen zesummen iessen, ënnert der Konditioun dass net méi wéi **4** Leit un deem selwechten Dësch sëtzen. **Während der ganzer Aktivitéit müssen ëmmer déi selwecht Leit beieneen un engem Dësch sëtzen. D'Masken däerfen heibäi ausgedoe ginn.**
- **D'Dëscher müssen op d'mannst 1,5 Meter ausernee stoen.**
- **D'Kachen an d'lesse sollen esou wäit wéi méiglech an d'Aktivitéit dobaussen agebonne ginn an och an der fräier Loft statt fannen.**
- Dofir suergen dass d'Hänn virun an nom lesse gewäsch ginn.
- Tassen, Glieser, Telleren, Besteck a Bidon net mat aneren deelen. Alles gétt nom lesse mat waarmem Waasser a mat Spullmëttel gespult.
- Wie während der Aktivitéit Ravi akafe geet, muss d'Reegele vun de Butteker anhalen (Mask undoen asw.). D'Akafe soll vun esou mann wéi méiglech Leit gemaach ginn (am Idealfall ee Chef eleng).
- Wa Saachen op d'Plaz geliwert ginn, sollen dës bei der Entrée vum Site ofgesat ginn, fir ze vermeiden dass extern Leit doduerch hin an hier ginn.

9. Schlofen

- Et ass méiglech, souwuel am Chalet wéi och an Zelter ze schlofen. **An all Dortoire oder Zelt däerfe maximal 4 Leit schlofen ; dës müssen an der selwechter Ënnergrupp si wéi beim iessen a wäschen (cf. Punkten 3, 8 an 10).**
- Heibäi soll eng gewëssen Distanz agehale ginn. Am Dortoire soll – souwäit wéi méiglech – nëmmen all zweet Bett beluecht ginn. **Während dem schlofen däerfen d'Masken ausgedoe ginn.**
- **De Chalet muss genuch Plaz hunn, fir déi jeeweileg Kontaktgrupp ënnert dëse Bedéngunge kënnen z'empfänken (genuch Dortoire fir all d'Participanten an Ënnergruppe vu maximal 4 Leit ënner ze kréien).**
- **D'Augangsspär tëschent 23h00 a 06h00 muss agehale ginn.-**
- **Bei der Umeldung vum Weekend oder Camp gétt de responsabele Chef en detailléierte Programm eran, wou kloer vermierkt ass, wéi d'Kontaktgrupp sech organiséiert fir dës Moosnamen anzehalen.**
- **De Weekend oder Camp muss vu genuch Chefs encadréiert ginn, fir ze garantéieren dass déi zousätzlech organisatoresch a logistesche Erfausforderungen - déi duerch dës Reegelen entstinn - kënne gemeeschtert ginn.**
- **Och e Weekend oder Camp soll dobaussen, un der fräier Loft, statt fannen.**
- **Aplaz vun engem Weekend oder Camp mat Iwwernuechtung(en), besteet d'Méiglechkeet, dës Aktivitéit als 2 oder méi Sortien hannereneen ze maachen, woubäi jiddereen heem schlofe geet. Doduerch gétt de logistesche Opwand verringert.**





10. Hygiène



- Reegelméisseg d'Hänn mat Seef a Waasser wäschen a mat Pabeiersdicher dréchnen, déi kënnen wech gehäit ginn.
- Wa kee fléissend Waasser (Leitung oder Bidon) zur Verfügung steet, muss eng Alkoholsléisung zur Verfügung gestallt ginn, méi jonk Kanner sollen dës awer nëmmen ënner Opsicht benotzen (oppassen op d'Sonn, den Alkohol kann zu Verbrennungen op der Haut féieren).
- E Poster ophänken, op deem erkläert gëtt wéi ee sech richteg d'Hänn wäscht (z.B. [Affiche vum SNJ](#)). Op strategesch wichtege Plaze solle Schëlde sinn, op deenen un d'Wichtigkeet vun der Hygiène (Hänn, houschten, néitsen) a vun der „sozialer Distanz“ erënnert gëtt.
- Dreckskeächte sollen en Deckel mat Fousspedall hunn.
- **D'Kierperwäsch (Zänn botzen, Duschen, asw.) geschitt just an den Ënnergruppe vu 4 Leit. Et däerf nëmmen 1 Ënnergrupp vu 4 Leit gläichzäiteg am Buedzëmmer sinn. Heibäi däerfen d'Masken ausgedoe ginn.**



11. Botzen

- All d'Raim, déi während der Aktivitéit am Gebrauch sinn (Gemeinschaftssall, Réfectoire, Kichen, Dortoir, Toiletten, Duschen, asw.) sollen op d'mannst ee Mol den Dag mat engem handelsübleche Botzmëttel gebotzt ginn.
- Uewerflächen, déi dacks ugepaakt ginn (Dëscher, Klensche vun den Dieren, Bastelmaterial, asw.) solle mat engem handelsübleche Botzmëttel gebotzt ginn.
- Reegelméisseg lëften (Chalet, Zelter).



12. Transport

- Am ëffentlechen Transport muss jiddereen, dee méi wéi 6 Joer al ass, zu all Moment eng Mask unhunn.



13. „Gestes barrières“

- Souwäit et geet Distanz (minimum 2 Meter) zu aneren halen.
- Eng Mask undoen (gëllt net fir Kanner ënner 6 Joer).
- Moie soen ouni d'Hand ze ginn oder sech soss géigesäiteg unzepakten.
- Reegelméisseg d'Hänn mat Waasser a Seef wäschen.
- Sech sou mann wéi méiglech am Gesiicht upaken.
- An den Ielebou oder an en Nuesschnappech houschten an néitsen.
- Einweg-Nuesschnappecher benotzen a se an eng Dreckskeächte entsuergen.




14. Individuell Schutzausrüstung

- Masken : Et sief bemierkt dass Masken oder all aneren Nues- a Mondschutz deen, dee se unhuet, net wierklech schützen, awer déi aner Leit ronderëm gi virun den Drëpse vun dëser Persoun (beim houschten an néitsen) geschützt. Gebrauchten Einweg-Maske gehéieren an d'Dreckskeesch. Stoffe Maske mussen reegelméisseg gewäsch ginn.
- Händschen : Wien Händschen undeet, riskéiert doduerch e falscht Gefill vu Sécherheet ze kréien. Wann d'Händschen net gewiesselt ginn, kënnen doduerch vill verschidden Uewerfläch kontaminiert ginn. Och wann een Händschen undeet, muss ee sech weiderhi reegelméisseg d'Hänn wäschen.
- Dir kënnt Material wéi Masken, Alkoholsléisung, Ofspärbändchen asw. an der Géisserei kréien, andeems dir et iwwer hygiene@lgs.lu bestellt.



15. Wann „ufälleg“ Chefs oder Jonker op der Aktivitéit dobäi sinn

- Persounen, déi ënnert enger spezieller Krankheet (Diabetiker déi mussen Insulin sprëtzen, schlëmm Häerz- oder Kreeslafproblemer, schlëmm chronesch Longeproblemer, Kriibs, schwéier Immunschwächt, staarkt Iwwergewicht) leiden, hunn en erhéicht Risiko fir beim Covid-19 schlëmm Komplikatiounen ze kréien. Dës Leit gëllen als „ufälleg“.
- Si kënnen u Guiden- a Scoutsaktivitéiten Deel huelen, mä mussen dobäi extra geschützt ginn, z.B. andeems si – souwäit et geet – Distanz mat deenen anere Chefs an de Jonken halen, bei enkem Kontakt mat hinne soll jiddereen eng **chirurgesch** Mask undoen an d'Hygiènesregelen anhalen.
- Den individuelle Risiko vun all Persoun ass schwéier anzeschätzen, dofir soll dëst am Beschten am Virfeld vun der Aktivitéit mat den Elteren, respektiv dem Dokter, ofgekläert ginn.



16. Wa Jonker oder Chefs Symptomer vun enger Coronavirus-Infektioun hunn

- Am Virfeld vun der Aktivitéit :
 - Eng Persoun, déi Symptomer vun enger Infektioun (Féiwer, Halswéi, Houscht) huet – net nëmmen den Dag wou d'Aktivitéit ufänkt, mä och schon an den Deeg virdrun – dierf net un der Aktivitéit deel huelen.
 - Dës Persoun muss doheem bliwen. Wann d'Symptomer weider unhalen, muss si hiren Dokter iwwer Telefon kontaktéieren, **an e „Centre de Consultations Covid“ goen** oder – am Noutfall – an d'Urgence vun engem Spidol.



- Wärend der Aktivitéit :
 - Soubal eng Persoun ufänkt Symptomer (Féiwer (>38,0°C), Halswéi, Houscht) ze spieren, muss dës Persoun op enger separater Plaz (Zëmmer, Zelt) isoléiert ginn **an** eng chirurgesch Mask ugedoe kréien, bis se d’Aktivitéit verléisst.
 - Dës Persoun muss esou séier wéi méiglech heem goen. Bei Mannerjärege sollen dowéinst direkt d’Elteren oder d’Kontaktpersoun fir den Noutfall (cf. [Fiche Médicale](#)), benoriichtegt ginn.
 - Wann d’Symptomer weider unhalen, soll dës Persoun hiren Dokter iwver Telefon kontaktéieren, **an e „Centre de Consultations Covid“ goen** oder – am Noutfall – an d’Urgence vun engem Spidol.
 - Fir de Rescht vun der Kontaktgrupp leeft d’Aktivitéit normal weider.
- Wann eng Persoun, déi un enger Aktivitéit deelgeholl huet, positiv op Covid-19 getest gouf :
 - Soll dës Persoun sech direkt an „Auto-Isolement“ setzen, all Kontakt mat anere Leit vermeiden an den entspriechenden online-Formulaire vun der Direktioun vun der Santé op covid19.lu ausfüllen oder hiren Hausdokter iwver Telefon kontaktéieren.
 - D’Persoun, déi positiv getest gouf, soll sou séier wéi méiglech jidderengem Bescheed soen, mat deem si e „Kontakt mat héigem Risiko“ hat. Dës Leit solle sech direkt an „Auto-Quarantaine“ setzen, all Kontakt mat anere Leit vermeiden an den entspriechenden online-Formulaire vun der Direktioun vun der Santé op covid19.lu ausfüllen oder hiren Hausdokter iwver Telefon kontaktéieren.
 - Als „Kontakt mat héigem Risiko“ gëllen all Kontakter, ouni Mask, op enger Distanz vu manner wéi 2 Meter, wärend op d’mannst 15 Minutten. Heibäi gëlle Kontakter, déi an den 48 Stonne virum Test (wann déi positiv geteste Persoun keng Symptomer huet), respektiv 48 Stonne virum Ufank vun de Symptomer, statt fonnt hunn.
 - Wann de responsabele Chef driwwer informéiert gëtt, dass u senger Aktivitéit eng Persoun deelgeholl huet, déi positiv op Covid-19 getest gouf, **muss** hie sech direkt iwver e-Mail u covid@lgs.lu mellen. Hei kann hien Informatiounen an Hëllef fir all weider Schrëtt kréien.
- Reintegratioun vu Persounen, déi positiv op Covid-19 getest goufen: Si kënnen **10** Deeg nom positiven Test op d’Aktivitéit kommen, ënnert der Konditioun dass si säit 48 Stonne keng Symptomer méi hunn. En zweeten – negativen – Test ass net noutwenneg.
- Fir Leit, déi e Kontakt mat héigem Risiko haten, ass d’Quarantaine 7 Deeg nom leschte Kontakt eriwver, ënnert der Konditioun dass en Test – dee fréistens de 6. Dag nom leschte Kontakt gemaach gouf – negativ war.





17. No der Aktivitéit

- No der Aktivitéit soll jiddereen, deen dobäi war (Jonker a Chefs), ganz gutt op Symptomer, déi méiglecherweis op eng Infektioun mam Coronavirus kéinten hiweisen (Féiwer, Houscht, Otemproblemer, anormal Middegkeet, **Duerchfall**, Verloscht vum Geruchs- **an/oder Geschmaachsënn**) oppassen. Falls si een oder méi vun dese Symptomer spieren, solle si hiren Dokter kontaktéieren.
- Si sollen och de Kontakt mat ufällege Leit (z.B. de Grousselteren) vermeiden.
- D'Chefs sollen déi Jonk op dës Virsiichtsmoosnamen opmierksam maachen.

18. Schlusswieder

- Dës Rotschléi sollen de Risiko vun enger Infektioun duerch de Coronavirus verréngeren. Et ass sécher net ëmmer einfach, fir se alleguer anzehalen. Null ass dee Risiko leider ni an et ass ëmmer méiglech dass eng Covid-Epidemie op enger Aktivitéit ausbrécht. Wann awer all d'Rotschléi - sou gutt et geet befollegt goufen - brauch an deem Fall kee sech e Virwurf ze maachen.
- **WICHTEG** : Jiddereen – déi Jonk an d'Chefs – solle bei de Versammlungen, Sortien, Weekender a Campe ganz vill Spaass hunn, och wann dëst Joer alles e bëssen anescht ass wéi soss.
- An deem Sënn: lénken Ielebou, David a Metti.

Bei Onkloerheeten oder Froen : covid@lgs.lu kontaktéieren

Falls déi offiziell Recommandatioune sollten erweidert oder geännert ginn, gëtt dëst Dokument sou séier wéi méiglech ugepasst. Weider Dokumenter an Informatiounen fannt dir op lgs.lu/covid.

Auteur : Dr David Heck

Korrektur : Metti Schmit, Lis Stirn, Marc Weis

Quellen :

- „[Recommandations sanitaires](#) de la Direction de la Santé dans le cadre de la crise sanitaire liée au Covid-19 à l'attention des organisateurs et animateurs d'activités de vacances pour enfants et jeunes“ – Direction de la Santé, Le Gouvernement du Grand-Duché de Luxembourg (07. & 21.07. & 01.09.2020)
- „[Vade-mecum d'organisation des camps d'été 2020](#)“ – Les Scouts (www.lesscouts.be)
- Covid-19 – Consignes dans le contexte de l'animation socio-éducative (secteur de l'éducation non formelle) à partir du 29 octobre 2020 – Direction générale du secteur de la Jeunesse

Biller :

- Mat der frëndlecher Erlabnis vu Les Scouts (www.lesscouts.be)
- Wëllefcher Lëtzebuerg-Cents

